

乙卯 上御朝夕講○自朝至巳時四方濁氣蒙霧夜南方異方東方如火氣慧星暫見於良方

丙辰 上御朝晝講夜對○諫院啓曰全羅右道水使崔豪當倭賊隱泊草島之時望見賊鋒先自恒怯退避不進南挑浦萬戶丁傑獨進力戰全船捕捉崔豪於啓聞之際歸功於已至陞嘉善南方之人至今痛憤既得重加便懷自是不復戮力於國事且以右水營當賊路要衝之地莫如避之以軍機重事置之度外御史權奸時軍器所備反不如各鎮浦且日以畋獵為事不恤軍卒用刑慘酷至割人耳貫以竹片下人嗷嗷不勝其苦請崔豪拿推本道充軍嘉善加並改正自古善用兵者必以足食為先食不足雖有兵不可以用之前朝之末外寇侵陵兵連禍結民不治農公私匱竭終至於御廩不繼足為後戒國家自有倭變以來郡國繹騷括兵之舉蹕令嚴急一家有丁夫雖至五六皆編於兵籍或以習陣或以習射贏糧往來長在道路今方農作之時野無秉耒之人加以點閱之闕皆徵米布備納之